

**Bil. 46**

**Selasa**

**8 Disember 2020**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KETIGA  
MESYUARAT KETIGA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Banjir di Daerah Seremban**  
- *YB. Tuan Cha Kee Chin (Rasah)* (Halaman 1)
- **Jalan Persekutuan Johor Bahru-Seremban  
(FT001) Daerah Kulai**  
- *YB. Puan Teo Nie Ching (Kulai)* (Halaman 9)

**MALAYSIA  
KAMAR KHAS  
PARLIMEN KEEMPAT BELAS  
PENGKAL KETIGA  
MESYUARAT KETIGA**

**Selasa, 8 Disember 2020**

**Mesyuarat dimulakan pada pukul 12.00 tengah hari**

**DOA**

*[Timbalan Yang di-Pertua (Dato' Sri Azalina Othman Said)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Banjir di Daerah Seremban**

**12.04 tgh.**

**Tuan Cha Kee Chin [Rasah]:** Terima kasih Tuan Yang di-Pertua. Pada tengah hari ini, izinkan saya mengetengahkan musibah banjir yang melanda Daerah Seremban pada awal pagi 4 November 2020. Banyak kawasan di Daerah Seremban telah dilanda banjir kilat pada awal pagi 4 November 2020, dengan banyak 1,000 buah rumah ditenggelami air sehingga paras lima kaki.

Di antara kawasan yang terlibat adalah Kg. Semarak, Taman Happy, Taman Mok Sum, Kg. Dato. Mansor, Kg. Singh, Kg. Sri Mantau, Kg. Chedang, Kg. Batu 3 Mambau dan beberapa lokasi lain di Parlimen Rasah, Dusun Nyior dan Kg. Ismail di Parlimen Seremban serta Kuala Sawah di bawah Parlimen Rembau.

Limpahan air dari Sungai Linggi merupakan punca utama kepada banjir kilat ini. Namun, banjir kali ini amat berbeza kerana paras airnya sehingga mencecah lima kaki yang telah membahayakan nyawa penduduk dan mengakibatkan kerosakan harta benda yang terlalu besar. Adalah dianggarkan kerugian harta benda penduduk mencecah berjuta-juta ringgit. Beberapa persoalan timbul selepas beberapa hari musibah ini terjadi, saya mohon pihak JPM memberikan jawapan terhadap persoalan-persoalan di bawah:

- (i) apakah tindakan yang telah diambil oleh NADMA dan agensi-agensi Kerajaan Pusat selepas seminggu banjir melanda;

- (ii) berapakah kekuatan daripada Angkatan Pertahanan Awam Malaysia yang telah dikerah untuk membantu mangsa banjir dan kawasan yang terlibat;
- (iii) apakah bantuan yang telah disalurkan oleh Kerajaan Pusat kepada mangsa banjir setakat ini. Jika ada, huraikan lokasi dan bilangan keluarga yang telah menerima bantuan daripada setiap agensi Kerajaan Pusat yang terlibat;
- (iv) jika kerajaan negeri telah memberikan bantuan segera secara tunai RM500 kepada setiap isi rumah yang terjejas, apakah Kerajaan Persekutuan bersedia memberikan bantuan secara tunai yang lebih tinggi dan jika ada, berapakah jumlahnya;
- (v) apakah rancangan atau tindakan jangka pendek dan jangka panjang daripada Kerajaan Pusat untuk mengelakkan musibah ini daripada berulang; dan
- (vi) apakah peruntukan sebanyak RM100 juta untuk Rancangan Tebatan Banjir (RTB) di bawah RMKe-12 yang dimaklumkan kepada saya pada tahun 2019, akan terus disalurkan untuk tujuan asalnya.

Saya mohon Yang Berhormat Menteri boleh memberikan jawapan kepada perkara-perkara yang disebutkan di atas. Sekian, terima kasih Tuan Yang di-Pertua.

**Timbalan Yang di-Pertua [Dato' Sri Azalina Othman Said]:** Silakan Yang Berhormat Menteri.

**12.06 tgh.**

**Menteri di Jabatan Perdana Menteri (Tugas-tugas Khas) [Datuk Seri Mohd Redzuan bin Md Yusof]:** Terima kasih Yang Berhormat Rasah. Tuan Yang di-Pertua, secara keseluruhan yang kita dengar, terdapat enam persoalan yang dibangkitkan oleh Yang Berhormat Rasah pada hari ini.

Semakan saya mendapati bahawa Ahli Yang Berhormat sebenarnya pernah membangkitkan sebahagian persoalan ini di dalam Kamar Khas pada 1 Julai 2019 dan juga semasa Waktu Pertanyaan Menteri pada 12 November 2020 yang lalu yang ditujukan kepada Yang Berhormat Menteri Alam Sekitar dan Air baru-baru ini dan di dalam jawapan beliau, saya ingat fakta kena diperbetulkan.

Daripada segi jumlah semakan JPS menunjukkan sebanyak 775 buah rumah yang terlibat. Bukannya lebih daripada 1,000 mengikut senarai kampung-kampung yang telah dinyatakan tadi.

Meskipun demikian, izinkan saya untuk menjawab satu persatu perkara yang dibangkitkan supaya ia dapat membantu Ahli Yang Berhormat mendapat maklumat tambahan dari sudut yang berbeza dan dapat melengkapi maklumat yang telah diperoleh sebelum ini. Persoalan pertama adalah mengenai tindakan yang diambil oleh NADMA dan agensi-agensi Kerajaan Pusat selepas seminggu banjir melanda.

Untuk makluman Ahli Yang Berhormat, Kerajaan Persekutuan dalam menghadapi kemungkinan bencana banjir besar semasa Monsun Timur Laut (MTL) 2020/2021 telah meluluskan bantuan awal kewangan dengan pengagihan seperti yang berikut:

- (i) RM50,000 kepada setiap Jawatankuasa Pengurusan Bencana Negeri;
- (ii) RM20,000 kepada setiap Jawatankuasa Pengurusan Bencana Daerah; dan
- (iii) RM280,000 kepada Angkatan Pertahanan Awam, secara spesifik RM20,000 kepada APM Negeri Sembilan.

Jadi, kalau kita faham tugas NADMA, kita cuma menguruskan bencana. Bila melibatkan banjir kilat, definisi banjir kilat tidak dikategorikan dalam bencana. Akan tetapi apapun, daripada segi pengurusan untuk membantu agensi-agensi yang terlibat, kita sama mengambil bahagian untuk memastikan kita boleh menguruskan dengan baik, lebih baik sebab kita dah ada pengalaman menguruskan bencana. Daripada segi definisi itu juga, kita akan semak sama ada banjir kilat yang teruk, boleh tak kita klasifikasikan sebagai bencana.

Kalau kita lihat ini, banjir-banjir kilat adalah diselaraskan daripada sudut bantuan oleh Jabatan Kebajikan Masyarakat dan juga Jabatan Parit dan Saliran. Penggunaan peruntukan yang disalurkan ini adalah dibenarkan bagi tujuan yang berikut:

- (i) perbelanjaan operasi Pos Kawalan Tempat Kejadian dan Pusat Kawalan Operasi Bencana;
- (ii) pembelian item pakai habis seperti minyak kenderaan dan peralatan penyelenggaraan kenderaan (*wear and tear*);

- (iii) perolehan barang keperluan segera di pusat pemindahan sementara (PPS). Selalunya banjir kilat tidak memerlukan PPS sebab PPS adalah untuk bencana;

■1210

- (iv) penyediaan makanan untuk petugas yang saya sebutkan tadi, Pusat Kawalan Operasi Bencana dan PPS yang lain; dan
- (v) lain-lain perbelanjaan operasi bagi tujuan melicinkan proses tindak balas sewaktu kejadian bencana sama ada kepada agensi kerajaan, pertubuhan bukan kerajaan atau kepada mangsa-mangsa bencana.

Selebihnya, pihak di Jabatan Pengurusan Bencana Negeri dan Daerah perlu menggembelngkan aset dan agensi-agensi tindak balas dengan bantuan atau sokongan badan korporat, pertubuhan bukan kerajaan dan komuniti di peringkat tempatan selaras dengan peranan dan tanggungjawab dalam kitaran bencana seperti yang telah dinyatakan dalam Arahan No.20 Majlis Keselamatan Negara: Dasar dan Mekanisme Pengurusan Bencana Negara.

Jadi jawapan saya adalah merangkumi cuma pengurusan bencana. Banjir kilat ini adalah diuruskan oleh saya sebutkan tadi, oleh Jabatan Kebajikan Masyarakat dan boleh bekerjasama dengan NADMA untuk menambah baik pengurusan itu sendiri.

Pihak NADMA akan terus bekerjasama rapat dengan setiap Jawatankuasa Pengurusan Bencana Negeri, Angkatan Pertahanan Awam Negeri dan lain-lain agensi berkaitan melalui sesi-sesi libat urus, simulasi bencana, pembinaan kapasiti komuniti dan perbincangan untuk meningkatkan ketahanan semua pihak terhadap bencana.

Selain daripada NADMA, Jabatan Bomba dan Penyelamat pula telah menubuhkan Pusat Sehati Pasca Bencana iaitu dengan membuat kerja-kerja pembersihan akibat kesan banjir dengan memfokuskan kawasan-kawasan awam seperti di lokasi berikut:

- (i) Kampung Mawar Mambau sebanyak satu operasi;
- (ii) Kampung Batu 3 Mambau sebanyak satu operasi;
- (iii) Pekan Rantau sebanyak satu operasi;
- (iv) Tahfiz Darul Widad Permatang Pasir sebanyak satu Operasi;
- (v) Eco Sungai Menyala Sua Betong sebanyak satu operasi; dan

- (vi) Taman Intan Duyung sebanyak dua operasi.

Pihak Bomba juga telah membantu Syarikat Air Negeri Sembilan dengan menyediakan lori tangki bagi pengagihan bekalan air bersih di sekitar kawasan Rantau yang terjejas akibat tebing sungai yang telah runtuh dan mengakibatkan bekalan air terganggu.

Tuan Yang di-Pertua, perkara yang kedua yang dibangkitkan adalah mengenai kekuatan Angkatan Pertahanan Awam Malaysia yang telah dikerah untuk membantu mangsa banjir dan kawasan yang terlibat. Untuk makluman Ahli Yang Berhormat, semasa bencana banjir di Seremban, seramai tujuh orang pegawai dan 58 orang anggota APM dikerah untuk membantu mangsa-mangsa banjir. Mereka terbahagi kepada dua pasukan operasi seperti yang berikut. Pasukan pertama yang terdiri daripada tiga orang pegawai dan 21 orang anggota ditugaskan untuk perkara seperti yang berikut:

- (i) menyelamatkan dan memindahkan mangsa banjir ke pusat pemindahan sementara;
- (ii) mengurus pusat pemindahan sementara dan menyelaraskan penugasan agensi bantuan dan sokongan lain termasuk menyelaraskan sumbangan serta bekalan bantuan bencana;
- (iii) menyelaraskan pengagihan makanan di pusat pemindahan sementara; dan
- (iv) menyediakan dan mengurus tugas siap siaga kecemasan serta bantuan awal perubatan dan ambulans.

Pasukan kedua yang terdiri daripada empat orang pegawai dan 37 orang anggota ditugaskan untuk perkara seperti yang berikut:

- (i) mengurus logistik kenderaan dan penghantaran pulang mangsa banjir ke kediaman masing-masing;
- (ii) mengurus proses penutupan dan pembersihan pusat pemindahan sementara;
- (iii) menyediakan dan menyelaraskan senarai nama penerima bantuan kepada yang layak dan yang memohon; dan
- (iv) menyelaraskan dan melaksanakan kerja pemulihan pasca bencana.

Selain penglibatan APM, JBPM juga terlibat sama bagi operasi banjir yang mana sebanyak 14 buah panggilan kecemasan telah diterima melibatkan

kejadian banjir yang berlaku di Daerah Seremban pada 4 November 2020. Susulan itu, Jabatan Bomba dan Penyelamat Malaysia telah menggerakkan anggota dan aset mereka seperti yang berikut:

- (i) 105 pegawai bomba pelbagai pangkat;
- (ii) 15 Unit *Fire Rescue Tender*;
- (iii) Lima buah bot jenis aluminium; dan
- (iv) 11 buah kenderaan utiliti iaitu lori dan pacuan empat roda.

Tuan Yang di-Pertua, perkara ketiga yang dibangkitkan adalah berkenaan bantuan yang telah disalurkan oleh Kerajaan Pusat kepada mangsa banjir setakat ini. Untuk makluman Ahli Yang Berhormat, sebagaimana Arahan MKN No.20 yang saya sebutkan tadi, Jawatankuasa Pengurusan Bencana Negeri terlebih dahulu perlu memainkan peranan bagi membuat permohonan rasmi bagi bantuan bencana RM500 untuk setiap isi rumah yang terlibat.

Setakat ini, NADMA masih belum menerima apa-apa permohonan berkenaan perkara ini dan NADMA akan segera memproses permohonan bantuan apabila menerima senarai daripada Jabatan Pengurusan Bencana Negeri.

Seterusnya, perkara keempat yang dibangkitkan pula adalah jika kerajaan negeri telah memberikan bantuan secara tunai RM500 kepada setiap isi rumah yang terjejas, apakah Kerajaan Pusat bersedia memberikan bantuan secara tunai yang lebih tinggi dan berapakah jumlahnya? Untuk makluman Ahli Yang Berhormat, pemberian bantuan kewangan yang lebih tinggi sedia dipertimbangkan tertakluk kepada kedudukan kewangan Kerajaan Pusat.

Namun demikian, sebenarnya Kerajaan Pusat telah pun mengeluarkan peruntukan yang disalurkan melalui pelbagai bentuk bantuan kepada mangsa-mangsa banjir antaranya seperti berikut:

- (i) bantuan kit makanan permulaan iaitu bantuan kit makanan permulaan dan penyediaan makanan harian;
- (ii) bekalan *facemask* dan *hand sanitizer* untuk kawalan COVID19;
- (iii) kawalan penyakit dan vektor di pusat pemindahan sementara;
- (iv) kawalan keselamatan di pusat pemindahan sementara dan rondaan keselamatan di kediaman mangsa-mangsa banjir;
- (v) pengurusan menyeluruh PPS sebelum ia dibuka sehingga ia ditutup;



- (vi) bantuan *cubicle tent* bertutup untuk menjaga privasi di pusat pemindahan sementara;
- (vii) petugas-petugas di tempat-tempat yang berkenaan; dan
- (viii) kerja-kerja pembaikan infrastruktur pasca bencana yang diberikan dan dilaksanakan oleh kerajaan dan lain-lain bantuan.

Semua perkara yang saya sebutkan ini juga merupakan satu bentuk bantuan yang memerlukan komitmen kewangan daripada Kerajaan Pusat. Jadi sebenarnya bantuan Kerajaan Pusat jika dinilai dengan nilai monetari, ia telah pun melebihi RM500 untuk setiap isi rumah.

Tuan Yang di-Pertua, perkara yang kelima yang dibangkitkan ialah mengenai rancangan atau tindakan jangka pendek dan jangka panjang daripada Kerajaan Pusat untuk mengelakkan musibah ini berulang. Untuk makluman Ahli Yang Berhormat, bagi tindakan jangka pendek, kerajaan telah mengambil langkah-langkah seperti berikut:

- (i) pemasangan empat siren amaran banjir dan tolok lurus (*stick gauge*) di Seremban. Sebelum banjir berkenaan berlaku, dua siren telah berbunyi di Kampung Ismail dan Kampung Ampangan Blok B. Dalam keadaan biasa, siren tersebut boleh didengari sehingga satu kilometer. Siren tersebut diuji setiap bulan oleh Jabatan Pengairan dan Saliran (JPS) dan terdapat juga sesi libat urus dengan para pemimpin masyarakat di kalangan Majlis Pengurusan Komuniti Kampung (MPKK) yang terlibat; dan
- (ii) Jabatan Pengurusan Sisa Pepejal Negara (JPSPN) melalui Perbadanan Pengurusan Sisa Pepejal dan Pembersihan Awam (SWCorp) telah menyelia pelaksanaan kerja-kerja kutipan dan pembersihan awam di Negeri Sembilan dan akan memastikan jadual pembersihan longkang di seluruh kawasan Daerah Seremban dilaksanakan oleh syarikat konsesi yang dilantik iaitu SWM Sdn. Bhd.

Bagi pelan jangka panjang pula, sebagaimana telah dijelaskan oleh Kementerian Alam Sekitar dan Air pada 12 November 2020 di mana KeTSA melalui Jabatan Pengairan dan Saliran (JPS) telah melaksanakan projek

Pembangunan Lembangan Sungai Bersepadu Sungai Linggi Fasa 4, Negeri Sembilan yang dijangka siap pada Mac 2022.

KeTSA juga telah memohon projek baru di bawah RMKe-12 bagi Pembangunan Sungai Linggi Fasa Ke-5 yang akan bermula dari Hilir Sungai Linggi di Kampung Nyatoh sehingga Pekan Mambau, Daerah Seremban dengan jajaran sepanjang lebih kurang 12 km.

Pada masa yang sama, KeTSA dan SWCorp akan menjalinkan kerjasama yang bersepadu dan berterusan bersama Majlis Bandaraya Seremban agar isu-isu di lapangan dapat diselesaikan secara terus seperti kerosakan struktur fizikal longkang yang perlu diperbaiki untuk dilaporkan kepada pihak majlis agar tindakan pembaikan segera dapat dibuat. Struktur longkang yang rosak turut boleh menyumbang kepada masalah aliran longkang dan menyebabkan banjir.

Tuan Yang di-Pertua, perkara yang terakhir yang dibangkitkan oleh Yang Berhormat adalah berkenaan sama ada peruntukan sebanyak RM100 juta untuk Rancangan Tebatan Banjir di bawah RMKe-12 yang dimaklumkan kepada Ahli Yang Berhormat Rasah pada tahun 2019, akan terus disalurkan untuk tujuan asalnya.

Untuk makluman Ahli Yang Berhormat, Jabatan Pengairan dan Saliran telah memohon peruntukan sebanyak RM150 juta bagi Projek Pembangunan Lembah Sungai Linggi Fasa Ke-5 di bawah RMKe-12 sepertimana pelan jangka panjang yang saya sebutkan tadi.

#### ■1220

Projek ini dijadualkan bermula pada 2023 dengan penumpuan di bahagian *upstream* dan bagi Program Ramalan Amaran Banjir Fasa 2 pula, JPS telah memohon sebanyak tiga siren tambahan dan tolok lurus untuk meningkatkan tahap kesiapsiagaan komuniti terhadap bencana banjir. Saya ingin memaklumkan juga bahawa peruntukan-peruntukan di bawah Rancangan Malaysia Kedua belas masih belum dimuktamadkan.

Tuan Yang di-Pertua, sebagai penutup, saya ingin mengambil kesempatan ini memaklumkan bahawa di bawah Angkatan Pertahanan Awam Malaysia, kerajaan telah memperkenalkan Program CDERT iaitu *Civil Defence Emergency Response Team*. Program ini antara lain bertujuan memberi nilai tambah ilmu keselamatan diri kepada komuniti dan seterusnya meningkatkan kadar kepekaan penduduk setempat dalam membantu kejiranan masing-masing khususnya yang ditimpa bencana termasuk bencana banjir kilat.

Saya berharap agar semua Ahli Yang Berhormat dapat uar-uarkan program ini di kawasan Parlimen masing-masing agar kita lebih bersedia dan

berkemampuan untuk menangani sebarang bentuk kecemasan atau bencana di kawasan komuniti kita kelak. Sekian, terima kasih.

**Timbalan Yang di-Pertua [Dato' Sri Azalina Othman Said]:** Terima kasih Yang Berhormat Menteri kerana sudi dalam kesibukan untuk hadir sendiri ke dalam Kamar Khas. Terima kasih.

**Jalan Persekutuan Johor Bahru–Seremban  
(FT001) Daerah Kulai**

**12.21 tgh.**

**Puan Teo Nie Ching [Kulai]:** Terima kasih Tuan Yang di-Pertua, terima kasih Yang Berhormat Timbalan Menteri. Tuan Yang di-Pertua, masalah Jalan Persekutuan Daerah Kulai iaitu Jalan Johor Bahru–Seremban (FT001) yang rosak dan keadaan struktur jalan yang kurang memuaskan bukannya sesuatu perkara yang baharu. Jalan ini merupakan jalan yang paling sibuk dan antara yang paling penting di kawasan Parlimen Kulai, Johor.

Pada 1 Ogos 2019, saya telah menulis kepada Ketua Pengarah Jabatan Kerja Raya berkaitan permasalahan ini. Saya difahamkan pada tahun ini iaitu 2020, terdapat lapan kerja pembaikan yang telah dilakukan antaranya:

- (i) kerja-kerja pembaikan jalan secara *mill and pave* di laluan FT001 JB-Seremban seksyen 20.00-25.00;
- (ii) kerja-kerja pembaikan jalan secara *mill and pave* di laluan FT001 JB-Seremban seksyen 34.00-35.00;
- (iii) kerja-kerja pembaikan jalan secara *mill and pave* di laluan FT001 JB-Seremban seksyen 50.00-51.00;
- (iv) kerja-kerja pembaikan jalan secara *mill and pave* di laluan FT001 JB-Seremban seksyen 40.00-42.00;
- (v) kerja-kerja pembaikan jalan secara *mill and pave* di laluan FT001 JB-Seremban seksyen 24.00-25.00;
- (vi) kerja-kerja pembaikan jalan secara *mill and pave* di laluan FT001 JB-Seremban seksyen 25.00-26.00;
- (vii) kerja-kerja pembaikan secara *regulate, overlay, mill and pave* di laluan FT001 JB-Seremban seksyen 45.00-48.00; dan
- (viii) kerja-kerja memperelok lokasi kerap berlaku kemalangan (*blackspot*) di laluan FT001 JB-Seremban seksyen 21.00.

Soalan saya kepada Kementerian Kerja Raya:

- (i) berapakah peruntukan yang diperuntukkan untuk Jalan FT001 Daerah Kulai bagi tahun 2018, 2019 dan juga 2020;
- (ii) berapakah peruntukan yang diperuntukkan untuk Jalan Negeri Daerah Kulai bagi tahun 2018, 2019 dan juga 2020; dan
- (iii) berapakah peruntukan kerja kecemasan yang diperuntukkan kepada Pejabat JKR Kulai bagi tahun 2018, 2019 dan juga 2020.

Sekian, terima kasih.

**Timbalan Yang di-Pertua [Dato' Sri Azalina Othman Said]:** Silakan.

**12.24 tgh.**

**Timbalan Menteri Kerja Raya [Dato' Eddin Syazlee bin Shith]:**

Dengan izin Tuan Yang di-Pertua. Terima kasih kepada Yang Berhormat Kulai di atas soalan yang dibangkitkan dan untuk makluman Ahli Yang Berhormat, Kementerian Kerja Raya sentiasa mengambil perhatian yang serius terhadap kerosakan jalan di seluruh Malaysia. Semakan kementerian mendapati jalan yang dimaksudkan oleh Ahli Yang Berhormat adalah di Laluan FT001 Jalan Johor Bahru–Seremban di Daerah Kulai, Johor.

Bagi tahun 2018 sehingga tahun semasa (2020), jumlah peruntukan yang telah diluluskan untuk pembaikan turapan di laluan FT001 adalah sebanyak RM8,052,508.00 iaitu:

<b>Tahun</b>	<b>Jumlah Peruntukan Yang Diluluskan</b>
2018	RM1,990,000.00
2019	RM1,800,000.00
2019	RM4,262,508.00

Manakala peruntukan yang disalurkan kepada JKR Daerah Kulai untuk pelaksanaan kerja penyenggaraan berkala turapan (*pavement*) dengan izin. Dalam tempoh masa tersebut adalah sebanyak RM17,265,400.00. Perincian peruntukan yang diluluskan mengikut tahun adalah seperti berikut:

<b>Tahun</b>	<b>Jumlah Peruntukan Yang Diluluskan</b>
2018	RM4,945,400.00
2019	RM6,235,000.00
2019	RM6,085,000.00

Selanjutnya, selain daripada itu, kementerian ini juga telah menyalurkan peruntukan bagi melaksanakan kerja-kerja kecemasan kecil dalam tempoh masa terdekat berjumlah RM140,876.85. Perincian peruntukan kerja kecemasan kecil yang diluluskan mengikut tahun adalah seperti berikut:

<b>Tahun</b>	<b>Jumlah Peruntukan Yang Diluluskan</b>
2018	RM41,370.64
2019	RM53,166.99
2019	RM46,339.22

Selanjutnya Yang Berhormat, berkenaan peruntukan penyelenggaraan bagi jalan negeri, sebenarnya diletakkan di bawah tanggungjawab kerajaan negeri melalui peruntukan MARRIS. Walau bagaimanapun, saya boleh kongsikan jumlah yang telah diberikan iaitu bagi tahun 2018 sebanyak RM5,645,000 manakala bagi tahun 2019 sebanyak RM6.235 juta dan bagi tahun 2020 sebanyak RM6.752 juta. Maknanya jumlah untuk ketiga-tiga tahun peruntukan penyelenggaraan jalan negeri ini berjumlah lebih kurang RM19 juta. Sekian, terima kasih.

**Timbalan Yang di-Pertua [Dato' Sri Azalina Othman Said]:** Terima kasih. Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 12.00 tengah hari, hari Rabu, 9 Disember 2020.

***[Kamar Khas ditangguhkan pada pukul 12.27 petang]***